

Al-Quran penawar menceriakan kehidupan



PARA jemaah tekun mendengarkan Ceramah Khas sempena Sambutan Nuzul Al-Quran.

BANDAR SERI BEGAWAN, Isnin, 12 Jun. - Pengarah Pusat Perhubungan Awam dan Antarabangsa, Universiti Islam Sultan Sharif Ali (UNISSA), Awang Haji Sammali bin Haji Adam berkata, manusia perlukan teman dalam kehidupan kerana tanpa teman manusia akan hidup dalam kesunyian. Walau bagaimanapun, terkadang teman akan terputus hubungan dengan sebab perselisihan.

Oleh itu, Al-Quran jelasnya, diturunkan ke atas manusia untuk dijadikan teman yang tidak pernah berselisih, malah padanya ada penawar untuk menceriakan kehidupan manusia. Formula untuk mendapatkan keceriaan melalui

Berita dan Foto :
Ihsan Haji Sammali bin Haji Adam

Al-Quran ialah dengan sentiasa mengamalkan pembacaannya, perlu selalu didengar malah perlu dihayati isi kandungannya.

Awang Haji Sammali menyatakan demikian dalam ceramah khasnya sempena Sambutan Nuzul Al-Quran yang dianjurkan oleh Jawatankuasa Takmir Masjid Pehin Khatib Abdullah, Kampung Kulapis.

Masjid yang boleh menampung seramai lebih kurang 700 orang jemaah ini, baru saja menghidupkan kegiatan takmirnya setelah perasmianya oleh Kebawah Duli

Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam pada 19 Mei 2017 yang lalu.

Majlis didahului dengan Sembahyang Fardu Subuh Berjemaah diimamkan oleh Awang Haji Zainal bin Haji Othman.

Turut hadir di majlis berkenaan ialah Imam masjid berkenaan, Awang Haji Muhd Burhanuddin bin Haji Damit serta penduduk Kampung Kulapis.

RPN Lambak Kanan adakan Nuzul Al-Quran



MAJLIS yang dihadiri oleh jemaah-jemaah, belia-belia dan ahli-ahli Muslimah Masjid Perpindahan Lambak Kanan (atas dan bawah).

Oleh : Marlinawaty Hussin
Foto : Masri Osman

BANDAR SERI BEGAWAN, Isnin, 12 Jun. - Majlis Nuzul Al-Quran anjuran Ahli Jawatankuasa (AJK) Takmir Masjid Perpindahan Lambak Kanan diadakan petang tadi di masjid berkenaan.

Majlis yang dihadiri oleh jemaah-jemaah, belia-belia dan ahli-ahli Muslimah Masjid Perpindahan Lambak Kanan itu dimulakan dengan bacaan Surah Al-Fatihah yang dipimpin oleh Ketua Imam masjid tersebut, Awang Haji Abdul Malik bin Haji Jumat.

Acara kemudian diikuti dengan bacaan Al-Quran 30 Juzuk serta Khatam Al-Quran dan diteruskan dengan bacaan Tahtim serta bacaan Tahlil bagi kaum keluarga para jemaah yang telah kembali ke rahmatullah.

Atur cara juga diselenggarakan dengan Majlis Berbuka Puasa. Majlis Nuzul Al-Quran merupakan acara tahunan AJK Takmir Masjid Perpindahan Lambak Kanan yang diadakan bagi menyemarakkan lagi Sambutan Nuzul Al-Quran.

Kejayaan inspirasi pertingkatkan prestasi bacaan Al-Quran

Berita dan Foto :
Wan Mohamad Sahran Wan Ahmadi

BANDAR SERI BEGAWAN, Isnin, 12 Jun. - Selain mengangkat nama negara, detik paling bermakna dalam kehidupan antaranya ialah, dapat mempertingkatkan mutu prestasi bacaan Al-Quran ke arah yang lebih baik melalui musabaqah yang disertai.

Para pemenang Musabaqah Menghafaz Al-Quran Berserta Pemahamannya Peringkat Akhir Kebangsaan dan Keputusan Musabaqah Menghafaz Al-Quran Berserta Pemahamannya Peringkat Negara Anggota MABIMS, setentunya memanjatkan syukur atas kejayaan yang diperolehi setelah diumumkan pada Majlis Sambutan Nuzul Al-Quran Peringkat Negara Tahun 1438 Hijrah di Dewan Plenari, Pusat Persidangan

Antarabangsa, Berakas malam semalam.

Juara Kategori Menghafaz 30 Juz Al-Quran Berserta Pemahamannya Juz 22, Awang Muhammad Hazri bin Haji Mohammad Hamzani yang mewakili penyertaan negara tidak menyangka kejayaan pada pertama kali menyertai kategori itu.

Pelajar Tahun Ke-3 dalam Program Diploma Aliyah Qiraat, Institut Tahfiz Al-Quran Sultan Haji Hassanal Bolkiah (ITQSHHB), yang berasal dari Kampung Rimba itu menyatakan membuat persediaan lebih kurang sebulan, termasuk ketekunan dalam mengulang hafazan serta latihan bersama para guru dan pembimbing dan tidak lupa kejayaan atas doa-doa keluarga (ibu bapa) dan guru-guru juga.

Sementara juara Kategori Menghafaz 10 Juz Berserta Pemahamannya Juz 8 gembira atas kemenangan yang diraihinya setelah kegigihan usaha dan kerja keras latihan mengulang membuahkan hasil.

Juga pelajar ITQSHHB, Dayang Ainaa Zahirah binti Haji Abdul Manap, 17, menceritakan walaupun kali kedua menyertainya, perasaan takut dan gugup itu tetap ada namun ia rasa teruja mewakili negara untuk bertanding bersama para peserta dari negara-negara anggota MABIMS yang lain.

Pelajar berasal dari Kampung Meragang itu juga menambah kejayaan datangnya persediaan latihan bersama para guru pembimbing dan juga sokongan ibu bapa dan keluarga.

Manakala, johan Kategori 'B' Menghafaz Surah-Surah Pilihan bagi yang berumur 17 tahun ke bawah, Awangku Muhammad Fakhur Razey bin Pengiran Damit menyatakan terima kasih kepada para guru, terutamanya keluarga yang sangat memberikan dorongan dan motivasi ke arah memberikan persembahan mutu bacaan yang baik.

Kesemua mereka akan meneruskan usaha dalam menjaga hafazan dan senantiasa istiqamah dalam mengulang Al-Quran, lebih-lebih lagi mempertingkatkan mutu bacaan ke arah yang lebih baik lagi.



AWANGKU Muhammad Fakhur Razey bin Pengiran Damit yang menjuarai Kategori 'B' Menghafaz Surah-Surah Pilihan bagi yang berumur 17 tahun ke bawah bersama kedua ibu bapanya.



JUARA Kategori Menghafaz 30 Juz Al-Quran Berserta Pemahamannya Juz 22, Awang Muhammad Hazri bin Haji Mohammad Hamzani.



DAYANG Ainaa Zahirah binti Haji Abdul Manap.